

Pleiv Rueun Ruschein Siat Pigniu

Protocol dalla radunonza generala dils 24.04.2022 allas 19.00 uras, a Ruschein

Beinvegni ed appel

Punctual arva il president Duri Coray la radunonza e beneventa tuttas presentas e tuts presents cordialmein.

Nies commember da suprastonza, Martin Schnoz, ha ord motiv da sanadat stuiu perstgisar.

Presents ein 23 parochianas e parochians , vuschabels.

Gliesta da tractandas:

1. Elecziun da dus/ as dumbravuschs
2. Protocol dalla radunonza generala dils 13-06-2021 a Pigniu
3. Rapport dil president
4. Plaid digl augsegner
5. Rendament da quen 2021 e preventiv 2022
6. Rapport dallas revisuras ed approbaziun dil quen e preventiv
7. Fixar il pei da taglia per 2022 e 2023
8. Orientaziuns
9. Varia

1. Elecziun da dus/ as dumbravuschs

Dumbravuschs vegnan tscharni ed elegi : Madalena Bisquolm Ruschein
Lorenz Alig Pigniu

2. Protocol dalla radunanza generala dils 13-06-2021 a Pigniu

Il protocol sura numnaus ei staus publicaus per liung temps sin la pagina d'internet da nossa pleiv. Ina prelecziun vegn buca pretendida.

Il protocol dalla radunanza generala dils 13-06-2021 vegn approbaus unanim.

3. Rapport dil president

Duri Coray dat sco usitau, en siu rapport presidial in sguard anavos sin il curriu e passau dront igl onn vargau. La pandemia da corona pari pil mument dat esser surmuntada ed aschia seigi la normalitad era turnada en baselgia.

Adina puspei per lavur procuri il manteniment da baghetgs e schischom. Sco per exempel donnas d'aua en casa parvenda a Pigniu.

A Ruschein, baselgia s. Gieri ei vegniu installau in niev indrez da tucclar cun in computer per programmar il tucclar.

Era a Rueun, baselgia s. Andriu, ha ei dau in`aschunta tier il programm existent da tucclar.

Il terren d'agricultura, ei vegnius affitau da niev e quei tenor il regulativ per l'affitaziun da terren.

Mirond el futur fa il president era quitaus per l'instrucziun relegiusa. Las differentas confessiuns ed ideologias dallas singulas famiglias procurien per ina gronda sfida da realisar ina suleta lecziun christiana, per jamna. Era seigi in cumbat per ch'ils affons retscheivien la preparaziun sin lur sacraments. Ei maunci las persunas dil fatg catachetas e catachets.

Alla fin engrazia il president a tuttas e tuts ch`ein sengaschai sin ina moda u l'otra per nossa pleiv.

4. Plaid digl augsegner

Sur Thomas entscheiva siu plaid cun statistica. En nossa pleiv ha ei dau igl onn 2021, 8 sepulturas, 7 s. battens e 3 nozzas.

Sur Thomas lai sentir, ch`el beneventa buca ina pastoraziun centrala da Glion. Quei fussi da donn per mantener il contact cun parochianas e parochians.

Plinavon menziunescha Sur Thomas era la pandemia da corona. Quei seigi stau in grev temps per la populaziun , in temps surprendent e malsegirs. Mo ussa selegri el che la gliעד tuorni era puspei en baselgia.

Alla fin engrazia sur Thomas a tuttas e tuts che sengaschan per nossa pleiv.

5. Rendament da quen 2021 e preventiv 2022

All`entschatta engrazia il cassier Toni Albin a nies fiduziari Adrian Bergamin per sia gronda lavur e sustegn.

Il quen da gudogn e sperdita 2021 sco era la bilanza dils 31.12.2021 ed il preventiv 2022 vegnan presentai cun agid d`in projectur.

Per ils 31.12. 2021 muossa la pleiv RRSP ora ina summa da bilanza da frs. 2`152`715.69 ed in capital jester da frs. 530`998.10 .

Quen da gudogn e sperdita 2021		preventiv 2022
Total entradas	302`506.39	290`600.00
Total expensas directas	- 8`539.30	- 9`300.00
Cuosts da persunal/ funcziunaris	-180`142.38	-188`000.00
Ulteriuras expensas	- 59`632.30	- 67`400.00
Total deducziuns	- 49`017.05	- 21`500.00
Total resultat da finanzas	<u>- 4`466.34</u>	<u>- 4`400.00</u>
Gudogn	709.02	0.00

Suenter la presentaziun dil quen, vegn dau la pusseivladat da far damondas.

Lorenz Alig ha vuliu sclariment en connex cun las deducziuns casas parvendas, ina summa da frs. 33`000.- .

Il cassier sa confirmar ch`ins ha cun quella summa scret giu l`investiziun dalla casa parvenda Ruschein per frs. 23`000.- e dalla casa parvenda Pigniu per frs. 10`000.-.

Plinavon informescha il cassier, che la renovaziun dalla caplutta s. Antoni Ruschein seigi terminada ed il quen serraus giu. Ils cuosts totals da 166`861.80 han saviu vegnir curclai totalmein ord donnaziuns. En num dalla pleiv in grond engraziament alla cumissiun renovaziun caplutta s. Antoni Ruschein.

6. Rapport dallas revisuras ed approvaziun dil quen 2021 e preventiv 2022

Las revisuras da quen, Claudia Tomaschett e Cornelia Coray han ord motiv da collisiun da termins, omisduas buca saviu prender part alla radunonza generala. Il rapport da revisiun vegn prelegius digl actuar:

Sin fundament da lur controllas san ellas confirmar :

-- che la bilanza per ils 31 da december 2021 ed il quen da menaschi 2021 corrispundan alla contabilitad

-- che tuttas cudischaziuns ein mussadas ora entras ils mussaments necessaris

-- che las vaglias cudischadas ein avon maun

-- che las expensas ein fatgas tenor conclus dalla radunonza generala e sin fundament dalla constituziun.

-- che las fatschentas ein vegnidas menadas tenor la constituziun.

Sin fundament dils resultads da revisiun proponan las revisuras d`approbar il quen annual 2021 e dar scarica a suprastonza e funcziunaris.

Il quen 2021 ed il preventiv 2022 vegnan approvai unanim.

7. Fixar il pei da taglia per 2022 e 2023

Sin proposta dalla suprastonza, decida la radunonza unanimamein , da schar il pei da taglia per igl onn 2022 e 2023 sin 16% dalla taglia cantunala.

8. Orientaziuns

Il president orientescha che Irmgard Cavigelli da Siat, hagi demissiunau sco catecheta. En num dalla pleiv in grond engraziament per sia lavur.

Niev surpren Madalena Bisquolm Ruschein il post da catecheta per l`1.- 4. classa a Rueun e Ruschein , e Stefanie Kälin la 5. e 6. classa a Rueun e Ruschein. Il president gavischa ad ellas bien success e plascher en la nova sfida.

Plinavon orientescha il president che la realisaziun per l`iluminaziun egl intern dalla caplutta s. Gion a Siat seigi messa sin via.

9. Varia

Lydia Coray damonda, pertgei che sur Thomas mondi buca sin santeri tier las s. messas da caudon e pertgei ch`igl augsegner prendi buca entscheins tier las sepulturas dat urna.

Sur Thomas rispunda, che tier las s. messas dil 30- avel mondi el adina sin santeri ed entscheins drovi el tier las sepulturas cun vischi. Tier sepulturas cun urna negin entscheins. Quei seigi tenor la liturgia. Ina declaraziun plausibla ei, ch`il tgierp ei tier sepultura cun urna, gia midaus en puorla.

Gregori Cavigelli vul saver, tenor tgei criteris ch`il funs d`agricultura dalla pleiv seigi vegnius affitaus.

Il funs d`agricultura ei vegnius affitaus da niev sin igl 1. da november 2021 e cuozza sis onns , pia entochen 1. da november 2027. Silsunter dat ei ina nova publicaziun e lu, tut tenor interress affitau da niev. Per affitar il funs,ha la suporastonza luvrau stretg tenor il regulativ per l`affitaziun da schischom dalla pleiv Rueun Ruschein Siat Pigniu.

Susi Spescha damonda co ei stetti cun il tuchiez dalla baselgia s. Flurin a Siat, che ha purtau empau discussiun ils davos onns.

Per entgins tunavi igl emprem bia memia dat ault e disturbava la sien. Suentar ha la pleiv stuppau empau las cucheras dil clutger , ed allura pren mira, tunavi per ils auters bia memia pauc. Sin quei han ins lu puspei aviert la mesadat dallas cucheras. Ed ussa para ei dat esser endretg.

Allas 20.10 uras siara il president la radunonza, el engrazia per la participaziun e giavischa a tuts in bien retuorn a casa. La radunonza siara cun in`oraziun.

Ruschein ils 24-04-2022

il president Duri Coray

igl actuar Hubertus Spescha

